

# La Spitex va cun il temp era sin il sector tecnologic

Da la radunanza da delegads da l'Associaziun da spitex dal Grischun

DA MARTIN CABALAZR

■ **L'Associaziun grischuna dals servetschs da spitex che è stada radunada dacurt a Cuira e s'occupada da l'actual process da digitalisaziun e da las consequenzas e schanzas che sa resultan da questa novaziun tecnologica per la spitex.** Radund 40 delegadas e delegads da las organisaziuns da spitex regiunalas e localas han assistì a la radunanza da delegads da l'uniun tetgala en l'hotel Cuira a Cuira. L'inscunter è stà cumplainamain sut l'ensaina da la digitalisaziun e da eHealth. Bain na vegnia betg a dar uschè spert ina «eSpitex» damai ch'i dovrà per ademplir in pensum talmain complex sco la tgira d'umans er en l'avegnir persunas che lavuran cun empatia e che èn ablas da patratgar a moda che collià plirs secturs da la vita. La presidenta da Spitex Grischun *Barla Cahannes* ha dentant accentuà en ses discurs introductiv quant impurtant ch'igl è per la spitex da nizzegiar ils svilups tecnologics actuals che gidian la finala a simplifitgar e meglierar la lavur da la spitex. «Cun la digi-

talisaziun da l'economia e da la societad stain nus pir a l'entschatta d'in process irreversibel e persistent che sforzia era da midar ed adattar las structurass», dil Cahannes. «La fin e las consequenzas da quel process n'èn oz betg pli previsiblas. Nus as chattain amez la pli gronda revoluziun dapi l'existenza da la umanità», concluda Cahannes.

## Il project da digitalisaziun

A la fin da la scuntrada annuala ha il referent ospitant *Arnold Bachmann* en sia funcziun sco schef operativ dal spital chantunal e parsura da l'uniun eHealth sidost medamamain pledà davart l'actual project da digitalisaziun en la sanadad publica e dals dossiers da passier electronic. L'uniun eHealth è vegnida fundada per sustegnair la realisaziun ed il manaschi d'uschenumnadas cuminanzeas da tschep. Questas èn tenor la recumondaziun da eHealth Suisse responsablas per manar ils dossiers da pazients en furma electronica en il rom d'ina strategia naziunala. La finamira ed il niz principal da questa rait naziunala è la colliaziun da tut

ils acturs sin il sector medicinal», ha punctuà Bachmann.

## Tractandas statutaras

Tranter ils dus referats han delegadas e delegads da l'Associaziun grischuna da spitex approvà tut las propostas da la supprastanza. Approvaziun unanima han tant il quint annual ed il budget sco il rapport annual 2015 retschavì. La radunanza ha dà scarica als organs responsabls ed han sancziunà ina midada da las statutas vertentas.

L'entira supprastanza è vegnida confermada en ses uffizi: Barla Cahannes (presidenta), *Roman Stähler* (vicepresident), *Johanna Weiss* (manadra da tgira da la

Spitex Cuira), *Corina Schmoz*, (mainagestiun da Spitex Foppa), *Gabriella Tomasschett-Berther* (deputada). Per ina ulteriura perioda d'uffizi vegn il post da revisiun surdà al post da revisiun Mittner & partenaris.

Cun grond applaus han las preschentas ed il preschents prendì cumià da *Tino Morell* che ha manà durant 15 onns il post da gestiun da l'Associaziun grischuna da spitex. Da nov vegn il post da gestiun manà da *Mario Evangelistica* sco mainagestiun e da *Monica Schmoz* sco sia substituta. A la fin da la radunanza han ils preschents già la pussaivladad da barat tar mainis ed experientschas e da tgirar vinavant la rait da contacts.

## Associaziun da spitex dal Grischun

L'Associaziun grischuna da spitex è l'uniun tetgala da las 19 organisaziuns regiunalas e localas da spitex che èn activas en il Grischun. Ella è ina organisaziun da patruns e dal fatg che gida e cusseglià sias commembras e ses commembers ad ademplir lur incumbensas. L'associaziun funcziuna sco plattforma d'infurmaziun per

ses commembers e s'occupa e coordinescha las dumondas relevantas en connex cun spitex.

Ella mantegn il contact cun las istanzas politicas, la assicuranzas, las casas da malsaus, las uniuns federalas ed ulteriuras organisaziuns che s'empatschan da la sanadad publica e dal socialesser.



La presidenta da Spitex Grischun Barla Cahannes circundada dal gestiunari partent Tino Morell e da ses successur Mario Evangelista.